

浙江文叢

祁彪佳日記

〔下冊〕

浙江出版聯合集團
浙江古籍出版社

浙江文叢

祁彪佳日記

〔下冊〕

〔明〕祁彪佳著 張天杰點校

浙江出版聯合集團
浙江古籍出版社



第十三卷 癸未日曆

癸未歲

正月初一日，夙興，禮天地。候班役不至，及乘騎於長安街，天明矣。上御殿，以群臣未齊還宮，再出，群臣乃趨至，慶賀罷，上閱馬，惟閣部大老侍班，群臣俱先至東宮候行禮，不及預也。與張玉筍談於端門下。出朝房，堂翁不至，諸同臺候予作公揖，予以馬逸遲。待出，禮神於鄉祠、會館，此外，投林老師及堂翁見帖即歸。是年爲大朝賀之期，乃因虜警，各省多不至，予預事計典者亦不能舉，爲國家二百八十年一變局，念此能不鬱鬱？寓中開薦武弁之賢能，以應樞部諮訪。

初二日，徐心水來晤。以肩輿出自正陽東行，晤宋孔章、馬培元。訪客至北，飯於開元寺，值同臺五六人。易吉服至國學，與甘慰萱、黃淡巖謁先聖，大司成孫泰器邀茶，別出訪晤郝崑岳，值左蘿石、宋榆山。至阜城晤金太液、徐心水，值賀無黨。

初三日，向梅舟來晤。出於衙門候堂翁行香開印，又候吳震崆點齋。至火房商回道定差事，飯罷乃歸。薄暮出訪客，晤楊方壺、宋榆山、陳青霖。

初四日，於順城門晤李拙予、陳眉丈。出城候劉念臺先生，入城晤倪株山、姚磊齋。午後再出晤徐虞求，值倪株山，與同訪馮鄴仙，不值，再訪吳玄素與吳磊齋，談及暮乃歸。是日周閻昭、郝崑岳、張蓬元來晤，予於此時方出諮訪單詢有司賢否，前是因虜倣方殷，諸君皆無暇及也。

初五日，不入公署，出晤李謙菴、甘慰萱即歸。馬培元來晤。午後，同臺倫百式、蔡培自、姚磊齋、曹秋岳共商議處嚴志印、喻翠浦事，得中州撫按揭，言汝寧被破之慘，凡見中州疏揭道彼荒殘，未有不墮淚者。薄暮作一疏促援兵，請明法紀，而未仍參督餉王逢源，作數行，托王紫眉舅商之劉先生，又作堂呈，請繳訪冊以先明賢否之大略。

初六日，有風，不出，以洩血延醫調治。何芝函、甘慰萱及何世兄敦季來晤。作一字與吳磊齋，得其所釘大計各疏稿。午後出晤戴巖犖，值吳震崆、左蘿石、馬培元。晤孫北海，值王介清、沈滄嶼。是日，以諮訪品評彙人訪冊，從吳震崆聞虜札青州七十里外，兗州之虜俱撤去，大略欲再攻青州也。

初七日，出候林季狃老師及梁階林、梁遂良、李謙菴。至東華門晤葉匡岑，詢以大計事宜。歸晤王昆華，與商起廢大計事。午後不出。是日始閱冊，取貴州部院及按君者先閱之，手錄於諮訪冊內。馮鄴仙至內宅，秉燭而談。

初八日，戴巖犖、葛無奇、周閻昭來晤，周以江西官評指示於予，寓中用印。徐山廉、余瞿

父來晤，即出與山廉候張二無堂翁，註學差及商起廢臺員事。是日拜督促援兵疏草，看議梁遂良呈。

初九日，張觀濤、吳磊齋來晤。薄暮出晤沈蒼嶼，值金太液。至余瞿父寓商閩中官評，已秉燭矣。草催點鄖撫及用操江疏，又草堂呈覆各城仍兼差。

初十日，出，會吳磊齋於朝房。令旨意官上疏訖，值霍魯齋亦至朝房，因談秦中用兵事甚悉。偕磊齋晤政府吳鹿友、周挹齋，商朝覲官員事，又同晤冢宰鄭玄岳歸。於寓中收大計冊，見山東按君所報，山東州邑十破其四，爲之憂絕。出晤陳青芝、吳玄素，適吳震崆亦來。燈下草回覆盧溝橋_(二)稅呈。

十一日，出城，晤劉念臺先生，數日得其贈詩，甚爲勗勉，乃謝之，又以葛介龕取同臺公費相贈之意，達之劉伯繩，歸以記事諮訪黃雷岸、劉端甫諸君。是日得見孫紫庭揭，糾參省垣。薄暮，走晤吳磊齋，歸寓徐心水來談。

十二日，於徐虞求寓晤張玉笥、王素公、吳磊齋。以姚磊齋待於予寓，乃歸晤之。蔡培自亦來談於書室，閱貴州記冊。

十三日，晤周彝仲，即於朝房值郝崑岳，知奴尚攻青州。昨張大司馬所云東光、吳橋有賊之說，未確也。又聞張九山死難信，甚爲惻然。上召對政府，遂不及晤。同吳磊齋於戶部晤傅東渤，又於朝房晤選君劉良哉，言甄別京卿及司官事。繇菜市口歸。以風雪午後不出。簡對

山西記冊將竣，作書復馮鄴仙。

十四日，晤吳震崆，值吳磊齋來，同訪何世兄敦季，即同晤黃東崖相公，知孫紫庭疏已下部院看議。歸慰葛介龕，以方被甄別也，值路廣心於馬上，議山陰父母事。午後，出晤陳玄聞公祖、倪株山年兄、倫百式道長。

十五日，出晤馮鄴仙，值沈滄嶼、傅孟禎，又走晤吳磊齋，值黃雷崖、方暮菴。午後不出，沈孟玄、吳震崆來晤。孫紫庭疏上密封下部院，堂翁下札於予，即草議稿，請再令孫指實。又作看錢長玉被論語，請行撫按勘問法之所在，皆不能徇也。方暮菴晚來晤，因其有疏留密撫，亦在孫事中耳。

十六日，陳眉丈、潘淡予來晤。出商議稿於吳磊齋，值沈滄嶼、朱玉槎。又商吳震崆，值其在周彝仲寓，乃走晤彝仲，值張玉笥。又晤太宰鄭玄岳，共商處分，便道晤孟肖形。午後晤梁芝三，堂翁張二無先生及金天樞、李玄篤。夜與陳長耀步街上，欲晤徐虞求不在，徐聞之即夜來晤予，偶見予門上有謗徐心水接差之飛語。

十七日，李梅公、徐心水、吳磊齋來晤，心水爲予晤首揆周挹老。楊用賓、傅東渤相繼來晤。予因堂翁之召，趨候之，乃以堂翁命，再晤鄭玄岳。午後再復張二無，霍魯齋來晤，作書寄外父，作家報寄內子，稍改議楊扶曦、廖孟符稿。

十八日，吳磊齋約，同晤蔣八公、陳贊皇兩政府，議入覲及同臺賜環諸事。聞徐虞求間住，

走慰之，值李拙予、金太液，即邀過予寓，共商樞入朝會推大理卿與保撫。出晤張二無，再稍易議稿，乃呈之堂翁。張虛舟來晤，爲楊錦仙致意，予卻其交際。薄暮時修來，周閻昭以其座師金楚畹被論來晤。

十九日，予已起值雨，上乃免朝。光含万來晤。出於堂翁近處白衣菴，邀蔡培自、甘慰萱、陳淡玄、張脩其、姚磊齋公議聖諭申飭巡方事宜，共晤張二無，酌其大略而退。飯後，即於都城隍廟會刑曹羅官道廷評張胥庭，審漕蠹、奸胥二起。晚閱《會典憲綱》。是日得淮上信，知南兵已有至者，賊南下至黃河邊，攻邳州不破，破豐縣、郟城。

二十日，不出，於寓中晤倫百式、俞華鄰、林可任、霍魯齋、朱玉槎，時尚未早飯也，後又晤劉蘭生。及晚而倪株山、吳磊齋、方慕菴相繼來晤。餘時皆草《衍繹聖諭稿》，是日方完《勿憚勤勞》、《勿殉情面》二則。得徐虞求札，以爲被放不宜申救，而不知徐心水、余瞿父已申救矣，作札復之。

二十一日，見孫紫庭疏，指實楊、廖二君之受賄，而白函一又以巡關衛邵孫疏薦劉大鞏不出其手，有疏參論。於寓中晤徐心水、吳震崆，即走謁張二無堂翁，途中遇余瞿父，借別寓與談。午後甘慰萱、曹秋岳來晤，餘時俱草議稿，完及半。

二十二日，出晤吳磊齋，值倪株山。欲向周彝仲乞政府於回話留劉、金二先生疏票放回，既而思有數存焉，非求之可得放，乃中止。惟晤李謙菴，因大風即歸。午後復出草議稿，完時

又有聖諭令言官多陞監司，予乃作呈稿自請外轉。

二十三日，夙興，上免朝，復就寢。吳存初、傅度山、潘皆生來晤，出晤余瞿父、徐山廉。午後，出晤蔡培自、張蓬元。因上邇來罕御門，且批答甚少，欲上疏，既而知聖目尚未愈乃止。是日聞奴虜已離登、萊，尚扎營於青州之六十里外。

二十四日，出晤左旦明、林非齋、李見可、吳存初，又慰阮旭青令郎、胡青蓮家眷。歸寓，姚磊齋、蔡培自、徐山廉來晤。出候張二無堂翁於書室，坐談，詢昨日上召對語極嚴，計典必舉其貪、其廉，以議稿及請外呈上，堂翁堅不之許。出晤傅度山，值方慕菴、傅小袁英率賊八千擒王，已至青州。

二十五日，走晤荆淡然。出城候劉念翁、徐虞求，值同鄉臺省五人。至順城門晤李拙予，值吳磊齋、倪株山。歸閱揭帖，作冢宰屯田及李涵白訐何松石二看稿。吳震崆來晤。

二十六日，上免朝，奉申飭大計聖諭，其中責成於予輩者甚嚴。出晤李謙菴、梁遂良，諮訪官評，又晤楊用賓，值王介清、左蘿石。又晤寧康侯。午後，倫百式、方慕菴、吳磊齋來晤。草恭捧聖諭矢力計典之疏，而請責成九卿、科道先舉大賢、大不肖之定評。

二十七日，出晤樞部王崇巖，知奴賊果有矢盡、馬病之事。再晤方慕菴，即同徐山廉向張二無堂翁註東省按差，晤堂翁於榻前。訪鄰邦父母於宋公菴歸，同宗康樂來晤。草疏稿成，寧康侯、陳眉丈、張北海相繼來晤。及暮倪株山、徐心水來晤，作書向李見可索副本。

二十八日，約同臺諸君於朝房會齊，公晤周挹齋、黃東崖、吳友鹿三政府，言張堂翁病狀正需調理，而今大計諸務駢集，請乞回天之力。得金天樞堂翁賜環以重紀綱之地，相君皆有擔當意。歸整理大計各冊，以山西、貴州予所閱過者送蔡培自覆閱。馮鄴仙來晤，蔡培自亦來出疏稿商之。

二十九日，五鼓至靈濟宮習儀，出晤曹秋岳，辨其人言波及之事數端，又晤林任先、張北海乃歸。午後晤堂翁，知魏昭華已告病，商監軍及山東數事而退。出晤任玉仲、何芝函。

二月初一日，五鼓起，至禮部護日。與同臺商首善書院事，欲求劉念翁一文，乃張二無意也。出於朝房候張玉筍，知其在朝晤相君，即入朝，與談於承天門下，商丘念修及監軍諸事。值方慕菴，知劉超已叛，戕殺王子房，上召政府，言之淚下。歸寓閱對陝西計冊。

初二日，五鼓起入朝，上傳制。出東長安門，於正陽門外晤金伯玉。入海岱門晤夏國山令郎，至朝陽門晤熊汝霖，飯於開元寺，值吳震崆、甘慰萱，瞻拜先師訖，晤潘皆生。從西直門晤張脩其、翁象韓，至堂翁處商保定察飭，乃聞蔣圖岩參張玉筍。歸寓，太宰鄭玄岳來晤，商年例大計諸事，張脩其、李謙菴來晤，與張商山右、江北官評至夜分。

初三日，五鼓起，上御門罷，召吏、兵二部商中州事。歸寓倦卧，起草勘丘念修及請罷秦督監軍二稿，以書致張玉筍。是夜大風雪，祭朝日者多中途回中。

初四日，大雪，不出。閱計冊，惟鄭大野、徐心水來晤。是日以臺中所送揭及劉念翁發來臺中揭，每一人彙釘爲一本。得劉良哉書，商會推事。

初五日，早入朝，於文華門賀太子千秋，即坐候直房，馮鄴仙來談，劉良哉亦至，再商會推。予出晤張玉筍於東闕直房。午餘乃會九卿科道，所推者爲保撫、豫撫、少司農、少司寇、操撫、南少司馬。歸，小憩，無客至。

初六日，出晤張蓬元、蔡培自、金天樞、徐山廉，乃謁張二無堂翁，值劉端甫，商監軍、保撫、年例諸事。午後周闇昭、李海公來晤，閱山東計冊。

初七日，方期約孫北海相晤，則知上行法於關、順二撫，以僉駕帖出矣。予惟晤王介清、光含万、倫百式、白函三、韓弗如，歸而孫北海、王雷岸相繼來晤。午後不出，以陝西計冊送蔡培自覆閱。作書與吳玄素、宋孔章、倫百式。少頃，王素公少宰來晤，觀廖孟符揭。

初八日，約潘淡予一晤，而曹秋岳、王雷臣、林非齋、徐心水、郭長公相繼來晤，竟不能出，潘淡予亦來晤。予即入公署，值甘慰萱，出候林老師，晤傅度山、汪長源歸。閱山東冊揭，蔡培自、姚磊齋、余瞿父相繼來晤，戶曹倪君光薦亦來晤。薄暮出晤潘淡予。

初九日，上御門。朝罷，聞召府部外，獨召寧康侯。又聞張二無堂翁告病允放，乃於晤吳玄素後即走晤之，談於書室。周彝仲、向梅舟來晤。午後，堂翁以各省計冊送予緘藏。晚閱河南冊揭，所開大略止河北三府，其大河以南皆文移不通，或僅記姓名耳，真時事一變局也。

初十日，吳磊齋早至，沈蒼嶼亦來晤，同磊齋候徐虞求，詢以官評，值徐心水亦來晤，又晤劉念翁先生，訪傅玉生春元。午後不出，草海運復島疏。

十一日，味爽，出趨朝。同吏都垣及方慕菴、蔡培自候於會極門。政府至，共向文華殿習儀訖，寒甚。午後，以肩輿候劉念臺先生，與之言別，不覺淚下。入城晤陳眉丈於門上，詢以秦中官評，又晤馮鄴仙，值楊方壺。晚約徐心水至寓晤談。

十二日，夙起，坐值房。吳磊齋來，示以太宰覆熊雨殷疏，頗爲不平，又觀寧康侯疏。至文華殿侍經筵班，講官胡菊潭講《仁言仁聲章》，羅吳臬講《尚書·無逸章》，上傾聽久之，賜宴於午門前，傳旨易葷^(三)以素。出於長安門，值沈滄嶼、倪株山，乃並馬歸。午後王紫眉舅來晤別，草一家信附寄。

十三日，上御門，朝罷，與同臺出東便門，於三忠祠送劉念臺先生，返晤張脩其、彭羽白於神廟中。姚磊齋邀同臺共飯於龍游館。至正陽門晤朱子美。午後，浙江大計冊至，乃知淮上之信，虜近淮止六十里，不免震動，覲官、孝廉多退至鎮江。出晤張二無堂翁，歸閱屯、鹽二大計揭，及馮鄴仙，值金太液，知倪鴻寶有疏至，其書極念予。

十四日，拜發海運復島疏，林老師來晤，徐心水亦來。出邀蔡培自同謁張北海，以其有署憲臺之旨也。走晤吳磊齋，值呂東川、倪株山，商同鄉銓部事。午後南臺朱慎瞻來晤，暇閱冊，錄之於諮訪冊中。

十五日，李玄篤來晤，出與蔡培自晤張北海，投見帖於張、金兩堂翁。晤趙石城、熊雨殷，時熊以言被處矣。歸寓左旦明來晤，出候林季翀老師，又晤梁遂良，詢粵東官評，又晤毛禹門。晚歸，吳來之來晤。晚草定紛囂之疏。

十六日，晤吳磊齋，值沈滄嶼，共言茗上人材官評。張北海入公署，予亦進，道出於長安街，晤吳震崧。歸寓，方呼本頭寫本，而吳磊齋又來晤，乃暫止其疏，適得吳震崧一字，道浮言之不足信，又達之吳磊齋。少頃，毛禹門來晤。晚作屯田添改敕書堂稿。

十七日，出晤馮鄴仙，并晤其令弟元颺孝廉。又晤熊雨殷，值吳震崧，共商官評。旋與震崧訪方密之，坐其書室，觀桃花已開，不勝故鄉之思。又晤方慕菴，乃歸。午後杜門閱冊。夏國山之令郎來晤。晚作明刑堂稿。

十八日，雨。余瞿父來別，周閻昭、馬培元相繼來晤，適福建、兩廣、楚中計冊至，所缺計冊止順天、滇中矣。出送余瞿父於門外，入城晤張北海。歸寓閱楚中疏揭，稍改定紛囂疏。

十九日，上御門。時臺中諸君皆上陵，予乃充東第二班。聞吳磊齋已乞歸，而疏中有候太宰語。晤太宰及王素公少宰於承天門下，商大計及年例與浙江司官諸事。走訪吳磊齋，堅謝客，作字與之。午後，又得其字。閱湖廣冊揭，錄之諮訪冊。

二十日，四鼓起，出於西直門外，送悼靈王殯。潘淡予邀予及吳震崧、曹秋岳、姚磊齋酌於太康伯園中，園多柳且大堤植柳，儼有江南風。從平子門歸寓，改疏稿，令書役謄寫。予出晤

蔡培自、黃淡岩，詢楚閩銓部，晤黃仲霖，詢中州事，又晤任玉仲、馮鄴仙，值曹秋岳。

二十一日，拜疏王素公。劉良哉來晤，托其爲吳磊齋調停於太宰。又與徐心水、沈蒼嶼晤吳友鹿相公，再謁張北海，商年例，及晤王雷臣歸，蔡培自、方慕菴、呂東川俱來晤。午後出晤吳磊齋，勸之出。又晤楊用賓，詢東省官評。夜填考滿官考語。

二十二日，沈蒼嶼、王崇岩早來晤。出晤孫北海，值王雷臣，又晤郭含九、姚磊齋，吊孫紫庭。歸作書致外父及金楚畹、李灌谿，又作家報數行，草再看錢長玉營謀稿。以便血請太醫診脈。劉端甫、陳仲謀來晤。

二十三日，上御門。與倪株山暫憩於禮垣。出晤沈炎洲，知楚事蹂躪已極，荊州破，武昌甚危。又聞虜已分三股北折，而復分兵攻澧縣。又晤陳仲謀，值李拙予。晤袁特丘，值李梅公，皆詢以官評。入衙門，考滿官過堂畢，歸草促訪冊、訪單、送同衙門稿。又作字復徐虞求。周闈昭來言別。

二十四日，留劉良哉於寓，走晤之。微雨，因張二無移寓東偏，亦走謁。歸寓，黃仲霖、徐心水、吳震崧、申素公相繼來晤，黃言汴功縷縷。午後晤吳磊齋，值張玉筍、徐心水方暢談，忽起異風。歸而選司郭一章以副憲保督江撫來商。燈下作另勘錢長玉營賄稿。

二十五日，大風竟日，天色晝昏，西長安坊吹壞。下午以肩輿入朝會推，與甘慰萱暫憩於中貴家，出則幾不能行。是日閱南直冊，倪株山、倪相如來晤。

二十六日，以公疏奉旨姑饒，乃邀同官謝恩。出晤張北海，歸而楊玉衡、沈芳揚、沈孟玄俱來晤。午後出晤楊玉衡、倫百式，及諮訪諸君官評。歸對閱南直冊完，作盧溝橋稅議裁稿。

二十七日，吳震崧、鄭全初、黃仲霖、姚磊齋、郭含九相繼來晤。方欲出而祁康樂來，出晤蔡培自，與約同晤太宰。歸方飯，馮鄴仙來談，遂閱冊不復出。薄暮李拙予來晤，與細商官評。

二十八日，復大風寒甚，下雪。以先一夜小腹作楚，延太醫調治。用肩輿出，吊徐山藏尊堂。不復出，閱對湖廣冊。

二十九日，上御門，公揖罷，與蔡培自於東朝房晤太宰、鄭玄岳，商大計之期，及推僉憲年例諸事。以肩輿走東偏，候張二無堂翁。至正陽門，晤朱遂初、朱慎瞻。值大風，歸而體中作熱，遂不能出。惟倫百式來晤。是日閱湖廣冊完。

三月初一日，晤張北海，即出城晤徐虞求，與商官評。又晤朱玉槎、周闈昭歸。午後候林季獅師，晤吳磊齋。晚作書與王雲岫，以山中爲托。

初二日，人文華殿侍經筵，講官爲王素公、方坦菴，講畢宴於午門外，復入會極門謝。出晤太宰於直房，再商大計之期。又晤葉匡岑，詢大計事宜。又於承天門下會張北海、左蘿石、曾二濂，同晤張玉笥諸君，別去再與大司馬談，乃同出朝。歸寓徐心水來晤，出晤呂東川、林任先、吳磊齋，值沈蒼嶼、倪株山，乃乘夜並馬歸。

初三日，出吊金天樞之封翁，與潘淡予、任玉仲談。又晤李孝廉，值龔芝麓。又晤陳眉丈，值王尊玉來巡城，因與李拙予共談，知趙匡谷有大捷，而大名一帶已有虜騎，且云至衛輝矣。歸而見蘇臨臯塘報，流賊已設僞官，踞荆襄，江路震驚，出晤張北海、李見可、向梅舟後即歸。草楚中賊勢叵測之疏，以手札促張脩其草公奠金太翁文。

初四日，袁特丘來晤。龔和梅、李謙菴皆詢以官評且商守江之策。又晤曹秋岳，值方密之。走吳磊齋寓，值傅度山，傅去，予即吳寓草昨疏完，歸即發寫上之。

初五日，郭一章早來，以會推僉院及江撫來商。少頃，李見可、李謙菴、李梅溪、李孝源相繼來晤。出於小菴，會同衙門公奠金太翁，因與江北諸公談江防事宜，談於蔡培自寓。即至吳磊齋，欲草請免朝覲及早舉糾察之疏，方草數行，聞已促會推，乃入朝。歸草疏完，寧康侯來，辨其上疏參密撫並無使之情。及晚徐心水以註學差來，出疏稿上觀之。夜體中以下腹氣滿不安。

初六日，聞上召對即趨入，知昨疏已得旨，而太宰請舉計典，則尚令待覲官之到也。予與方坦菴、朱玉槎初候於會極門直房，幕客凌超亦以召至，與之晤談。旋聞上御文華後殿，乃趨至文華門直房，至午刻始入對，語《召對紀事》中。蒙上賜茶餅，謝恩而出，再候於直，上傳令回衙門，乃出。王素公、倫百式來晤。張北海以年例一事有札至，又出晤之。歸草《紀事》畢，金太液晚來晤。

初七日，功司劉良哉與蔡培自來晤，即出於閔金吾宅會同鄉諸君沈蒼嶼等，公奠金天樞封翁。午後不出，僅與陳長耀看比鄰之屋。李謙菴來晤，深以寇警爲憂。輯孫、廖諸言官相訐疏，彙成付錄，改削昨請大計疏稿，以承召對發端。

初八日，聞毛禹門陞僉院，出投見帖。至吳磊齋寓談訖，晤寧康侯、楊用賓，又因吳震崧在磊齋寓，再晤之。馬數驚，幾墜。至林老師宅，同馮鄴仙送玉帶、牙簡。歸而俞鄰華、曹秋岳來晤。午後出城，因目徐求虞以書言別，乃晤留之。歸晤沈孟玄，得劉念臺通州來書，相望惓切，愧無以復。昨作察運糧公移，吳來之以會推來商。

初九日，於毛堂翁宅投見帖，拜數客，即至衙門候其到任，火房公揖罷，再與舊咨諸公於宅公晤。歸寓趙震所來，詢以黔、滇官評。出至東闕門內，會推通政及新設承天巡撫。歸值大風，從安福衛衛歸。

初十日，聞吳友鹿相公出督師楚中，乃與臺省諸公晤之。與蔡培自謁張北翁，謝其署篆。出城候金天樞堂翁，入城晤陳幾亭，座中值凌君名超者。前初六日同召對凌君，陳七奇三正，予因略詢其概。午後整大計各冊，親送毛禹門堂翁。

十一日，入衙門候堂翁行香，至午後方出。程錦壺來晤，比晚馮鄴仙來晤。早間劉良哉以大計過商。予於暇閱冒濫京堂揭，及屯、鹽兩君冊。

十二日，近聞虜已往西，閱傅孟楨、衛紫嵐諸揭，云破順德，攻廣平，從武安將於潞、澤出